

Premi grischun da cultura, premis da renconuschientscha e da promoziun 2017

1. Il premi grischun da cultura 2017 vegn surdà a

Leta Semadeni

en appreciaziun da sia lavur sco poetessa e sco translatura en vallader – ina satiglia, bufatga, empatica ovra da vita lirica. Dacurt ha ella agiuntà ses emprim roman a questa ovra: Tamangur, in cudesch d'ina forza poetica, cun ina istorgia captivanta, scritta en ina bellezza chapriziusa. Il premi è dotà cun 30 000 francs.

2. In premi da renconuschientscha en l'import da mintgamai 20 000 francs vegn concedì a:

Claus Fröhlich

en appreciaziun da sia lavur sco fisicher d'atmosfera e sco pionier en la retschertga – cun metodos da mesiraziun per satellit – da las activitads dal sulegl e da sia influenza sin l'atmosfera da la terra ed il clima. Sco emprim directur dal Center mundial per studis da radiaziun a Tavau (1971-1999) ha el procurà che Tavau survegnia in renum internaziunal sco piazza da perscrutaziun.

Gabriela Gerber e Lukas Bardill

en appreciaziun da lur videos, objects, fotografias ed installaziuns plain allusiuns e plain fantasia davart la cuntrada dal Grischun cun las muntognas, ils lais, ils edifizis e cun autras intervenziuns da l'uman.

Gustavo Lardi

en appreciaziun da ses engaschament instancabel a favur d'ina activitad prospectiva per l'Ente Museo Poschiavino ch'è in punct da referiment da l'istorgia regionala.

Vanessa Nicola

en appreciaziun da sia passiu e da sia decisiun, cun las qualas ella intermediatescha a ses scolars ed al public admiratur ina furma d'art viva e creativa sco il saut. En sia lavur dat ella paisa a la tschertga permanenta d'in equiliber tranter la tradiziun e l'innovaziun da las emoziuns.

Mevina Puorger Pestalozzi

en appreciaziun da sia lavur sco translatura ed editura per auturas ed auturs rumantschs. Tras sias ediziuns en tudestg/rumantsch vastamain renconuschidas, cumparidas en la chasa editura Limmat, ha ella rendì accessiblas las ovras er ad in public ordaifer il mund rumantsch.

Christof Rösch

en appreciaziun da sia lavur sco architect e sco artist sco er sco cuninventader e manader dal Center Nairs a Scuol. Ensemen cun ina pitschna gruppa ha el sviluppà il center da cultura sper l'En ad ina instituziun traglischanta che ha pudì vegnir adattada dacurt per l'avegnir, grazia ad ina renovaziun cumplessiva.

Martin Zimmermann

en appreciaziun da ses operar sco musicist en il Quartett Calamus, sco dirigent dal chor da la SME, cun il qual el metta en pe mintga onn projects nunusitads, e sco manader passiu dal Chor grischun da giuventetgna ch'el ha fundà e ch'el maina ussa a la fluriziun musicala.

Communicaziun da la regenza, chanzlia chantunala dal Grischun, 7000 Cuir

Andrea Zogg

en appreciaziun da sias prestaziuns sco actur multifar e sco reschissur che vegn reconuschì en Svizra ed a l'exteriur per sias preschentaziuns en il film e sin tribuna.

3. In **premi da promoziun** en l'import da mintgamai 20 000 francs vegn concedì a:

- Pia Anderwald, biologa
- Nora Bertogg, chantadura
- Flavio Bundi, musicist
- Gianluca Calise, musicist
- Rebecca Clopath, cuschiniera natirala
- Flurin Giger, actur e reschissur
- Chris Hunter, artist figurativ
- Prättiger Alpameitiä, musicantas da musica populara
- Roland Vögtli, musicist

Il premis vegnan surdads en il rom d'ina festa che ha lieu venderdi, ils 16 da zercladur 2017, a Lavin.

Gremi: regenza

Funtauna: rg chanzlia chantunala dal Grischun